

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1. Siunnersuummut pingaarnertut tunuliaqutaasut

Siunnersuut suliarineqarpoq ilaatigut Naalakkersuisut E-sportip timersuutitut akuerisaanissaanut kissaataat tunuliaqutaralugu. Naalakkersuisut naalakkersuisoqatigiinnissaminnik isumaqatigiissutiminni allappaat naalakkersuisoqatigiit E-sportip timersuutitut akuerisaanissaanut sulissuteqarniarlutik.

Siunnersuut aamma suliarineqarpoq Nakorsaaitit Pissassaatitut Atorneqartarnerinut Kalaallit Nunaanni Akiuisunut allattoqarfimmi aqutsisut arlaannaannulluunniit attuumassuteqanngitsumik allattoqarfeqalernissaannik kissaataat tunuliaqutaralugu.

2. Siunnersuummi immikkoortut pingaarnertit

2.1) Inatsisit atuuttut

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq tunngavigalugu inatsit atuuppoq.

Timersuummut taaguut pillugu

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersumi § 2, imm. 1-mi timersorneq pillugu paasinninnermik nassuiaasoqarpoq. Inatsimmi matumani timersorneq tassaatinneqarpoq timigissarniarluni aamma peqqissarniarluni timi atorlugu sammisaqarneq.

Imm. 2-mi nassuiarneqarpoq timigissarneq qanoq paasineqarnerseq. Kaloortat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnertut timigissarneq nassuiarneqarpoq.

Imm. 3-mi peqqissarniarluni timi atorlugu sammisaqarneq nassuiarneqarpoq. Peqqissarneq tassaatinneqarpoq tarnikkut, sianissutsikkut timikkullu sammisaqartarneq pilerseqqinniarlugu sunngiffimmi sammisaqarneq.

Imm. 4-mi unammilluni timersorneq qanoq paasineqassanersseq nassuiarneqarpoq. Unammilluni timersorneq tassaatinneqarpoq timersornerup ilaa, aalajangersimasunik maleruagassaqarluni ingerlanneqartartoq, taakkunanilu unammineq ilaalluni.

Tapiissutit pillugit

§ 11-mi aalajangersarneqarpoq Kalaallit Nunaanni Timersoqatigiit Kattuffiata suliaqarneranut aningaasanut inatsimmi ukiumoortumik tapiissuteqarnikkut tassunga

Naalakkersuisut aningaasaliissuteqassasut. Imm. 2-mi aalajangersarneqarpoq tapiissutit allaffissornermi aningaasartuutitut, sulisut, aqutsisut sungiusaasullu ilinniartitaanerannut, immikkut kattuffinnut peqatigiiffinnullu ilaasortaasunut ingerlatitseqqinnermut aamma nunani tamalaani unammiaaarnerni aamma nunani tamalaani timersornikkut suleqatigiinnermi peqataanermut tunngaviusumik tapiissutaasut. Imm. 3-mi aalajangersarneqarpoq tapiissutit ilai siunertanut aalajangersimasunut atorneqartussatut aalajangerneqarsinnaasut. Imm. 4-mi atugassarititat sukumiinerusunik aalajangersakkat tunngavigalugit tapiissutit piumasaqaatitaqarsinnaapput. Imm. 5-imi Naalakkersuisut Kalaallit Nunaanni Timersoqatigiit Kattuffiannik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugit angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisat aalajangersarneqassallutik. Isumaqatigiissut tunngaviusumik pissutsinut atuuttunut eqqarsaatigalugit ukiukkaartumik nalimmassarneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 12, imm. 1-imi aalajangersarneqarpoq Naalakkersuisut aningaasanut inatsisitigut Elite Sport Greenlandip suliaqarneranut ukiumut tapiissuteqartassasut. Imm. 2-mi tapiissutit allaffissornermi aningaasartuutit akilerneqarnerinut aamma Elite Sport Greenlandip suliaqarnerani aningaasartuutit akilerneqarnerinut tunngaviusumik tapiissutitut tunniunneqartarput. Imm. 3-mi aalajangersarneqarpoq tapiissutit ilai siunertanut aalajangersimasunut atorneqartussatut aalajangerneqarsinnaasut. Imm. 4-mi aalajangersarneqarpoq tapiissutit piumasaqaatinik erseqqinnerusumik aalajangersarneqartunik aalajangerneqarsinnaasut. Imm. 5-imi aalajangersarneqarpoq Naalakkersuisut Elite Sport Greenlandimik angusaqarnissamut ukiunut sisamanut isumaqatigiissuteqassasut, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut ukiukkaartumik nalimmassarneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 13, imm. 1-imi aalajangersarneqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarnerini piumasarineqartoq taakku nakorsaaitit pissassaaititut atorneqartartut pitsaaliornissaat akiuinerlu pillugu Nakorsaaitit Pissassaaititut Atorneqarnerinut Kalaallit Nunaanni Akiuisut maleruagassanik aalajangersagaanik malitaqassasut eqqortitsissasullu pillugu maleruagassanik aalajangersaaneq, tak. § 21, imm. 2, nr. 5. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq. Imm. 2-mi aalajangersarneqarpoq Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarnerini piumasarineqartoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atuissasullu

maleruagassanik aalajangersaaneq, tak. § 5 imm. 2. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasagaateqarnermik kinguneqassaaq.

§ 19-imi aalajangersarneqarpoq Kalaallit Nunaanni Timersoqatigiit Kattuffiat tassaasoq Kalaallit Nunaanni timersornikkut timigissarnikkullu aqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, matumani nunanut tamalaani pisartut ilanngullugit sinniisuuvoq.

§ 20-mi aalajangersarneqarpoq suliffeqarfik imminut pigisoq Elite Sport Greenland tassaasoq timersortartunik pikkorissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, matumani nunani tamalaani pisartut ilanngullugit sinniisuuvoq.

Imm. 2-mi aalajangersarneqarpoq Elite Sport Greenland Kalaallit Nunaanni Timersoqatigiit Kattuffiat tassanilu kattuffiit, timersoqatigiiffiit kattuffeqanngitsut aamma timigissartarfiit suleqatigalugit siunertaminik tapersersuissasoq, ilaatigut ukununga tapersersuinnermigut:

- 1) timersornermik piginnaasallit timersortartullu pikkorivissut sungiusarnerinut aamma unamminerni peqataanerinut, nunani tamalaani pikkorivissut timersornerini peqataanissamut periarfissamik siuarsaasoq,
 - 2) nunani tamalaani timersornermi kingusinnerusukkat peqataanissaq siunertaralugu piginnaasalinnik inerisaaneq,
 - 3) pikkorivissut pillugit sungiusaasut ilinniartitsinerillu,
 - 4) Kalaallit Nunaanni timersornermi nakorsaanikkut immikkut ilisimasalinnik ineriartortitsineq, aamma
 - 5) pikkorivissut soqutigisaannik isumaginninneq nunanilu tamalaani peqataanissaq siunertaralugu Kalaallit Nunaanni immikkut kattuffinnik aqqissugaasumik ineriartortitsineq.
- Imm. 3-mi aalajangersarneqarpoq Elite Sport Greenland Naalakkersuisut suleqatigalugit timersornikkut piginnaasaqartunik pikkorivissunillu tapersersuissasoq timersornikkut piginnaasaqartoq pikkorivissorlu timersornermik ingerlataqarnermi saniatigut ilinniarnissamut periarfissaqartillugu.

Allattoqarfimmik sullissineq

§ 22, imm. 5-imi aalajangersarneqarpoq Kalaallit Nunaanni Timersoqatigiit Kattuffiat Nakorsaatit Pissasaatitut Atorneqarnerinut Kalaallit Nunaanni Akiuisunut allattoqarnerinut ikiuissasoq.

2.2 Siunnersuutip imarisai

Siunnersuut Inatsisartut inatsisaannut atuutsinneranik sakkortunerulersitsivoq, tassa E-sport qarasarsorlunilu unammiaarnerit unammiaarluni timersuutitut taaguutitut ilanngunnissaat siunnersuutigineqarmat.

E-sport pillugu tamanna ilanngunneqarpoq naalakkersuisoqatigiit tassunga isumaqatigiissutaannut kissaataat tunuliaqutaralugu. Tassunga tunuliaqutaavoq E-sportip ingerlaavartumik ineriartornera takuneqarsinnaammat, aamma Nunatsinni. Aamma E-sport nunani arlalinni timersuutitut akuerisaavoq, kiisalu Nunat tamalaat akornanni Olympiske Komitép aalajangiuppaa 2027-mi Olympic Esports Gamesertoqassasoq.

Qarasarsorluni unammiaarnerit ilanngunneqarsimapput, qarasarsorluni unammiaarnerit nunarpassuarni timersornertut akuerisaammat, qarasarsorlunilu unammiaarnerit ilaat (skak aamma bridge) Nunat tamalaat akornanni Olympiske Komitémit timersuutitut akuerisaallutik. Naalakkersuisut aamma Kalaallit Nunaanni qarasarsorluni unammiaarnerit siuarsarnissaat eqqarsaatigalugit siunertamut tulluurtippaat qarasarsorluni unammiaarnerit timersuutitut unammissutitut akuerineqarneqarpata.

E-sport, aamma elektronisk sportitut taaneqartartoq, qarasaasiamik spil-ertermut siamasissutut unamminermullu tunngatinneqartumik nalinginnaasumik atorneqartarpoq. Taamatut spil-erneq qarasaasiat, konsol-it oqarasuaatikkulluunniit angallattakkakkut ingerlanneqartarput. Timi atorlugu timersuut, qarasaasiat iluaqutigalugit ingerlanneqartoq E-sportimut nassuiaammut ilaanngilaq. Taakku ilaatigut tassaasinnaapput E-cykling aamma E-roning. Siunnersuummi taaguut E-sport atorneqarpoq.

Qarasarsorluni unammiaarutinit ilaapput timersuutitut taaneqarsinnaasut timikkulli piginnaasanik aallaaveqanngitsunik angusaristakkat, eqqarsartaatsikkut tarnikkullu piginnaasanik aallaaveqartut. Spil qarasarsorluni unammiaarnerit taagorneqassappat inernerit pingaarnertut spillertut pikkorissusaat malillugu pisassaaq. Qarasarsorluni unammiaarnerit assersuutigalugu tassaapput skak, backgammon allallu nallukattanik pinnguaatit, pikkorissunit ingelanneqartartut. Ilanngullugu oqaatigineqarsinnaavoq nunat tamalaani peqatigiiffiit, soorlu International Mind Sports Association (IMSA), ilaatigut uku ilaammata skak, bridge, go, mahjong aamma poker il.il.

§ 2, imm. 1-imi timersorneq kiisalu imm. 2-mi timigissarneq pillugit taaguutit tunngaveqassapput timikkut sammisaqarnermik, aalajangersimasumik siunertaqarluni timersuutigineqartut. E-sport imaluunniit qarasarsorluni unammiaarneq timikkut aalanermik timersornertut qasujaallisarnermilluunniit taaguummattuumassuteqanngillat. Taamaammat E-sport qarasarsorlunilu unammiaaqatigiinneq timersorneq pillugu inatsimmi timersornermut qasujaallisarnermullu ilaatinneqanngillat. Inatsimmi allami aamma E-sport qarasarsorlunilu unammiaarneq pillugit aalajangersakkanik soqanngilaq.

Aalajangersimasumik siunnersuutigineqarpoq unammissutitut timersorneq pillugu nassuiaatip allanngortinnissaa, taamaalilluni erseqqissarneqarluni unammissutitut timersorneq timikkut, qarasarsornikkut elektroniskitigullu unammissutaasut nassuiarneqarlutik. E-sportip qarasarsorlunilu unammiaarnerit immikkuullarissutaat tassaapput unammissutitaqarmata, taamaammallu taamaallaat unamminermi timersornermi E-sport qarasarsorlunilu unammiaarnerit attuumassuteqarlutik.

Aamma timersorneq, timigissarneq peqqissarnerlu pillugit nassuiaatit peerput. Peqqissarneq pillugu nassuiaat timersorneq qasujaallisarnerlu pillugit Inatsisartut inatsisaanni atuuttumi taamaallaat ilanngunneqarsimavoq, peqqissarneq nassuiaammut qasujaallisarnermut nassuiaammut ilaatinneqarmat. Timersorneq qasujaallisarnerlu taaguutigitinneqarput nalinginnaasut qaqugukkulluunniit taakkununga nalinginnaasumik paasinnittarnermut naapertuuttumik paasineqartariaqartut. Timersorneq pillugu nassuiaammik aalajangiusseqqaneq aamma unammiauarluni timersornermut nassuiaammut nutaamut siunnersuutigineqartumut ataqatigiissinniarneqarnera ajornakusuusaaq.

Kalaallit Nunaanni E-sport Inuit Esportimit aqqissuussaavoq, taannalu inuit naapittarfianni nassaarineqarsinnaalluni. E-sport Kalaallit Nunaanni Timersortartut Kattuffiannit timersuutitut akuerisaanngilaq.

Kalaallit Nunaanni qarasarsorluni unammiauarneq skak eqqarsaatigalugu peqatigiiffeqarpoq – Kalaallit Nunaanni Skakkertut Kattuffiat, tassungalugu klubbit ilaasortat kattuffimmut ilaallutik. Kattuffiup nittartagaani atuarneqarsinnaavoq skakkertartut nunat tamalaat akornanni unammiaarnerni peqataasareermata. Qarasarsorluni unammiauarneq Kalaallit Nunaanni Timersortartut Kattuffiannit aammattaaq timersuutitut akuerisaanngilaq.

Naatsorsuutigineqarsinnaavoq peqatigiiffiit allat E-sportimik qarasarsorlunilu unammiaarnermik ingerlataqartut pilersinneqarnissaat, E-sportip qarasarsorlunilu unammiaarnerit timersuutit ilaattut akuerineqarsimaleriarpata. E-sportimik qarasarsorlunilu unammiaarnerit timersuutitut akuerineqarsimaleriarpata timersuutit taakku aamma Naalakkersuisunit taperneqarsinnaalissapput.

E-sport qarasarsorlunuunniit unammiauarneq Kalaallit Nunaanni Timersoqatigiit Kattuffiannit timersuutitut akuerisaanngimmata, kattuffiup imaaliiallaanaq § 11, imm. 2 malillugu immikkut kattuffinnut aamma E-sportimut qarasarsorlunilu unammiaarnermut tapiissutit ilaannik atuinissamut pisussaatinneqassanngilaq. Immikkut kattuffiit taakku ilaasortatullu peqatigiiffiit aamma Naalakkersuisunit taperneqarsinnaalernissaat Naalakkersuisut siunertamut naapertuuttutut isigaat. Siunnersuummi taamaattumik Kalaallit Nunaanni Timersoqatigiit Kattuffiannut ilaasortaangitsunut immikkut kattuffinnut timersoqatigiiffinnullu aningaasanut inatsimmi ukiumut tapiissuteqarnissamut Naalakkersuisut aningaasaliissuteqarnissaat aalajangersarneqassaaq. Tassunga atatillugu tapiissutit ilai siunertanut aalajangersimasunut immikkut atugassanngortinneqassasut tapiissutinullu erseqqinnerusumik piumasaqaatit piumasaqaatigineqassasut aalajangersarneqassaaq. Aalajangersagaq § 11 a-tut ilanngunneqassasooq siunnersuutigineqarpoq. Naatsorsuutininik tunniussinissamut tunngatillugu, tapiissutinik tapiiffigitittut uppersaanissaannik qinnuigineqarneratigullu tapiissutit siunertamut atorineqarsimanerannut uppersaanissaannik taamaallaat piumaffigineqarnissaat pisariaqartinneqarsimavoq.

E-sportip qarasarsorlunilu unammiaarnerit timersuutitut unammissutitut akuerisaanerisa kingunerisaannik siunnersuummi § 13-ip allanngortinnissaa siunnersuutigineqarpoq, taamaalilluni tassani aalajangersakkat aamma immikkut kattuffinnut timersornermullu peqatigiiffinnut Kalaallit Nunaanni Timersornermut Kattuffimmut ilaasortaanngitsunut tapiissuteqartoqartarnissaaq ilassaaq. Aalajangersakkami pineqarpoq sukasaatinik atuinissamut pitsaaliuineq pillugu malittarisassanik malinnittussaataaneq kiisalu malitsitsineq aamma timersorluni unamminerimi allanngortitsinerinik akiuineq.

Aamma sunniutaasussaq tassaavoq § 19-ip allanngortinnera imm. 2-mik ilanngussinikkut. Immikkoortoq 2-mi aalajangersarneqarpoq timersuutini immikkut kattuffiit timersoqatigiiffiillu Kalaallit Nunaanni Timersoqatigiit Kattuffianut ilaasortaanngitsunut eqqarsaatigalugit, timersuummi pineqartumi kattuffiup pisortatigoortumik Kalaallit Nunaat, tassunga ilanngullugu nunat tamalaat sinniisuuffigissagai.

Aamma tamatuma kinguneranik § 20, imm. 1 aamma 2-p allanngortinnissaat siunnersuutigineqarput. Imm. 1-imi tamanna pivoq ima ilassuteqarnikkut: "Pisortatigoortuni, soorlu nunat assigiinngitsut akornganni, kattuffik Kalaallit Nunaannut sinniisuvoq. Timersornermullu timigissarnikkullu aqqissugaasumik ingerlataqarneq pillugu Kalaallit Nunaanni Timersoqatigiit Kattuffiat peqatigalugu sinniisuuneq pisarpoq. Immikkut kattuffik aamma timersortartut peqatigiiffiat Kalaallit Nunaanni Timersoqatigiit Kattuffiannut ilaasortaanngikkaangat timersuummi pineqartumut immikkut kattuffik peqatigalugu sinniisuuneq pisarpoq." Imm. 2-mi aallaqqaasiut imatut allanngortinneqarpoq: "Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, matumani Kalaallit Nunaanni Timersoqatigiit Kattuffiannut ilaasortaanngitsut, timersoqatigiiffiit immikkut kattuffeqanngitsut aamma timigissartarfiit suleqatigalugit siunertaminik tapersersuissaaq ilaatigut ukununga tapersersuinermit:" Taamaalilluni ilassut tassaalerpoq "Kalaallit Nunaanni Timersoqatigiit Kattuffiat tassanilu immikkut kattuffiit" aamma tassani erseqqissarneqarpoq, timersoqatigiiffiit taaneqartut tassaasut immikkut kattuffinni aqqissugaanerini ilaanngitsut.

Tamatuma kinguneranik § 23, imm. 1-ip allanngortinnissaa siunnersuutigineqarpoq. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi peqatigiiffiit aamma timigissartarfiit avataanni timersornermi timigissarnermilu ingerlataqartut kattuffiit. Tamatuma kingunerissavaa Nakorsaatit Pissasaatitut Atorneqartarnerinut Kalaallit Nunaanni Akiuisut pissasaatinik atuinermik akiuinermit pitsaaliuinerimullu immikkut kattuffinnut timersoqatigiinnullu peqatigiiffinnut suleqatigiinnissamik isumaqatigiissusiornissaat.

Tamatuma kinguneranik § 24, imm. 1-ip allanngortinnissaa aamma siunnersuutigineqarpoq. Tamanna pivoq ilassuteqarnikkut immikkut kattuffiit timersornermullu peqatigiiffiit Kalaallit Nunaannit Timersornermut Kattuffimmut attuumassuteqanngitsut immikkut kattuffiit, timersornermut peqatigiiffiit kiisalu qasujaallisarfiit timigissartarfiillu atuisunut aamma

ilisimatitsissuteqartussaataalernerannik Nakorsaatit Pissassaatitut Atorneqarnerinut Kalaallit Nunaanni Akiuisunik suleqatigiinnissamut isumaqatigiissuteqarsimanerlutik.

Taakku saniatigut § 22, imm. 5-ip allanngortinnissaa siunnersuutigineqarpoq, taamaalilluni aalajangersarneqarluni Naalakkersuisut Nakorsaatit Pissassaatitut Atorneqarnerinut Kalaallit Nunaanni Akiuisunut allattoqarfimmik ikiuutissallutik. Maanna Kalaallit Nunaanni Timersoqatigiit Kattuffiat Nakorsaatit Pissassaatitut Atorneqarnerinut Kalaallit Nunaanni Akiuisunut allattoqarfimmik ikiuupput. Kalaallit Nunaanni Timersoqatigiit Kattuffiat timersortartunut peqatigiiffiuvoq. Nakorsaatit Pissassaatitut Atorneqarnerinut Kalaallit Nunaanni Akiuisut arlaannaannulluunniit naak attuumassuteqanngikkaluartut Kalaallillu Nunaanni Timersortartut Kattuffianit attaveqanngikkaluarluni pissassaatinik akiuiniarnermut ataqatigiissaarisut, allattoqarfiup Kalaallit Nunaanni Timersortartut Kattuffiannit avissaartillugu nukittorsarneqartariaqarput, taamaalillunilu tamanut soqutigisanik aporaattoqannginnera takutillugu. Nakorsaatit Pissassaatitut Atorneqarnerinut Kalaallit Nunaanni Akiuisunut immikkut allattoqarfiliornikkut siunnersuutikkut qulakkeerneqassaaq allattoqarfiup arlaannaannulluunniit attuumassuteqannginnissaa.

3. Pisortanut aningaasaqarnikkut allaffissornikkullu sunniutissat

Siunnersuut pisortanut allaffissornikkut kinguneqassanngitsutut nalilerneqarpoq.

E-sportip qarasarsorlunilu unammiaarnerit eqqarsaatigalugit immikkut kattuffinnut timersornermullu peqatigiiffinnut qanoq tapiissuteqartigisoqassanersoq aningaasanut inatsimmi aalajangersarneqartarpoq.

Nakorsaatit Pissassaatitut Atorneqarnerinut Kalaallit Nunaanni Akiuisunut allattoqartitsineq eqqarsaatigalugu allannguutissatut siunnersuutigineqartup, tassa Kalaallit Nunaanni Timersoqatigiit Kattuffiannit Naalakkersuisunut allattoqarfiup nuunneranik nassataqartussap, Kalaallit Nunaanni Timersoqatigiit Kattuffiannut tapiissutaasartut ukiumut tapiissutinik 300.000 kr.-inik sulinermit missingersuutigineqartutut aningaasartuut ikileriarnernannik kinguneqassaaq. Naalakkersuisut aalajangerpaat kikkut allattoqarfimmi ikiortaassanersut, tassungalu atatillugu aningaasanik nuussisoqassaaq.

4. Inuussutissarsiutinik ingerlataqartunut aningaasatigut allaffissornikkullu sunniutissat

Inuussutissarsiortunut aningaasatigut allaffissornikkullu kinguneqarnissaa naatsorsuutigineqanngilaq.

5. Avatangiisinut, pinngortitamut inuillu peqqissuunissaannut sunniutissat

Siunnersuut avatangiisinut pinngortitamullu aningaasaqarnikkut aqutsinikkullu kinguneqarnaviannngilaq.

E-sportimik sungiusarnej, timikkut sungiusarnermik tapertaqartinneqartoq, taakkuninnga sammisaqartunut timikkut tarnikkullu peqqissuunermik annertusaasinnaavoq.

E-sportimik sungiusarneq qarasarsorlunilu unammiaarnerit timersortartunut tarnikkut inooqatigiillu akornanni peqqissutsimut iluaqutaasinnaapput, assersuutigalugu E-sportimik timersornermi, inuusuttorpassuit inooqatigiinnermi tarnikkullu atugassarititaasunik ajornartorsiuteqartut suleqatigiinnermut ilanngussinnaallutik. Qarasarsorluni unammisitsineq timersortartup immikkut sammisaqarnerulernissaanut iluaqutaasinnaavoq. Utoqqaat tarnikkut sapiiseriaatsinik suliaaqqartinneqartuullutik sammisaqartartut puigortunngornermut nappaammut (demens) periarfissaannik annikillisaataasinnaapput.

Akerlianilli E-sport timersornerup annertuumik ingerlanneqartillugu sunniutinik ajornerusunik pilersitsisinnaavoq, soorlu sinnakilliornermik, inuunermi pisinnaasanit avissaarneqarluni aammalu timikkut ingerlatsisarnermit annikillisitsineq.

E-sport akuerisaaneratigut nammineq kajumissutsimik suliaqartut amerlanerulernerannik kinguneqarsinnaavoq. Nammineq kajumissutsimik suliaqarneq, peqatigiiffinnik ingerlatinneqartartut, innuttaasut tarnikkut peqqissusaannut iluaqutaassapput.

6. Inuit pisinnaatitaaffii aamma innuttaasunut kingunerisassat

Innuttaasut naatsorsuutigissavaat sammisassanut periarfissat amerlissasut, peqatigiiffiit E-sportimik qarasarsorluniluunniit unammiaarutinik suliallit timersornermik peqatigiiffiit timersuutinik akuerisaasunik suliaqartut allat assigalugit tapiissutinik qinnuteqarsinnaalerpata.

Naatsorsuutigineqarsinnaavoq timersorneq timigissarnerlu pillugit Inatsisartut inatsisaanut E-sport qarasarsorlunilu unammiaarnerit ilaalerpata peqatigiiffilerisut nukittorsarneqassasut, tassa peqatigiiffiit nammineq kajumissuseq naapertorlugu ingerlanneqarmata, taamalu innuttaasut eqqarsartaatsikkut peqqissusaannut iluaqutaassalluni. Peqatigiiffilerisut nukittorsarneqarpata inunnut ataasiakkaanut sammisaqarsinnaanerit sunniuteqassasoq naatsorsuutigineqarpoq, timikkuinnaanngitsoq aammali tarnikkut eqqarsartaatsikkullu sunniuteqassalluni.

E-sport aamma qarasarsorluni timersorneq akuunerulersitsinermik aammalu innuttaasut ataatsimoorfinnut isersinnaanerannut iluaqutaasinnaapput peqatigiiffinni timersortarnermilu, E-sport aammalu qarasarsorluni timersorneq suaassutsinut, ukiut, timikkut/tarnikkut innarluutilinnut aammalu sumiiffigisamut apeqqutaatinnagu tamanit peqataaffigineqarsinnaammata.

Siunnersuut FN-ip Innarluutilinnut pisinnaatitaaffiit Isumaqatigiissutaani artikel 9, immikkoortoq 1 naapertorlugu, pitsaasumik kinguneqarnissaa naatsorsuutigineqarpoq, pingaartumik timikkut tarnikkulluunniit innarluuteqartut nunatsinni nunanilu allani unammisitsinerni peqataasinnaanerat pillugu.

Nakorsaatit Pissassaatitut Atorneqarnerinut Kalaallit Nunaanni Akiuisunut allattoqartitsinermut tunngasumik allannguinnikkut aalajangiisartut arlaannaannulluunniit attuumassuteqannginnerannik isumannaannerulersitsissaaq.

7. Nunanut allanut tunngasunut sumiiffimmilu politikimut kingunerisassat kiisalu kingunerisassat allat

Nunanut allanut attaveqaatinut aamma nunap immikkoortuanut politikkimut tunngasunut imaluunniit allanik pingaarutilitsigut kinguneqassanngilaq.

8. Oqartussaasut suleqatigiiffiillu il.il. tusarniaavigineqarnerat

Siunnersuut piffissami 23. december 2025-mit 23. januar 2026-mut Naalakkersuisut tusarniaanernut nittartagaanni tamanut ammasumik saqqumitinneqarpoq piffissamilu tassani tusarniaaffissatut attuumassuteqartunut tamanut tusarniutigineqarluni. Tassunga atatillugu ilanngussaq 2 tusarniaanernut tunngasoq innersuunneqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Imm. 1-imut

Siunnersuutip pingaarnertut siunertaraa timersornerup immikkoortortatut ataatsimoortumik erseqqissarnera aammalu pisortanit akisussaaffimmik pingaaruteqarnerulersinneqarnissaa, ilaatigut pisortat oqartussaaffiisa kiisalu timersornikkut aaqqissuussinerit suliaasaqarfiani akisussaaffiisa erseqqissarneqarneratigut.

Pisortat oqartussaaffiisa akisussaaffigaat timersornermut peqatigiiffiit suleqatigalugit qulakkeerinninneq, timersorneq timigissarnerlu inuiaqatigiinni tamani siuarsarneqarnissaat, tamatumani meeqqerivinni atuartinneqarnermilu, ilinniartitaanermi, sunngiffimmi neqeroorutini, suliffiup iluani kiisalu peqqissutsimut inooqatigiillu akornanni sullinneqartut ilanngullugit.

Imm. 2-mut

Aalajangersakkami atuuttumi Inatsisartut Inatsisaanni § 2, imm. 4-mi aalajangersagaq ingerlatitseqqiineruvoq, taamaattorli nutaatut erseqqissaatigalugu timersorluni unammineq timikkut, qarasarsorluni aammalu elektroniskiusumik ingerlanneqarsinnaasoq.

Unammilluni timersuutit, eqqarsartaatsikkut ingerlanneqartut, tassaapput qarasarsorluni unammiaarnerit, soorlu skak, bridge aamma backgammon.

Unammilluni timersuutit, elektroniskinik ingerlanneqartut, tassaapput E-sportit. Elektroniskimik unammissutit tassaasinnaapput qarasaasiat, konsollit imaluunniit smartphones.

E-sportip imaluunniit qarasarsorluni unammiaarnerup timersuutitut unammissutitut ilaatinneqassappata timersuut aalajangersakkami oqaaseqatigiinnik siullernik eqquutsitsisimassapput. Tassani aalajangersarneqarpoq unammilluni timersorneq tassaasoq timersornermi unaminertalimmi, malittarisassat aalajangersimasut malillugit ingerlanneqartartoq.

Nr. 2-mut

§ 2, imm. 2-mi timersorneq, qasujaallisarneq peqqissarnerlu pillugit nassuiaatit atorunnaarsinneqarput. Tamanna pillugu oqaaseqaatit nalinginnaasut innersuussutigineqarput. Unammissutitut timersorneq pillugu imm. 4-mi nassuiaat atorunnaarsinneqarpoq § 1, imm. 2-milu allannguutissatut siunnersuummi oqaasertaliussanik taarserneqarlutik.

Nr. 3-mut

Imm. 1-imut

Oqaaseqatigiit ”immikkut kattuffiit timersornermullu peqatigiiffiit, Kalaallit Nunaanni Timersoqatigiit Kattuffiannut ilaasortaangitsut” ima paasineqassapput, kattuffiit peqatigiiffiillu timikkut timersornermik ingerlataqartut Kalaallit Nunaanni Timersoqatigiit Kattuffiannut ilaasortaangitsut, kiisalu kattuffiit peqatigiiffiillu E-sportimik qarasarsorlunilu unammuaarnermik ingerlataqartut. Tamanna siunnersuummi aalajangersakkanut taassuminnga atuisunut atuuppoq.

Kattuffiit peqatigiiffiillu taama ittut kingorna Kalaallit Nunaanni Timersoqatigiit Kattuffiannut ilaasortanngussagalarpata Kalaallit Nunaanni Timersoqatigiit Kattuffiannut tapiissutit aqqutigalugit tapiissutinik pisalersinnaassapput.

Imm. 2-mut

Kalaallit Nunaanni Timersoqatigiit Kattuffiannut tapiissuteqartarnek eqqarsaatigalugu tapiissutit ilai siunertanut aalajangersimasunut immikkut atugassanngortinneqarsinnaasut tapiissutinullu erseqqinnerusumik piumasaqaatit piumasaqaatigineqarsinnaasut aalajangersarneqarpoq. Akerlianilli pisariaqanngilaq, soorlu Kalaallit Nunaanni Timersoqatigiit Kattuffiannut kiisalu Elite Sport Greenlandimut atuuttoq, Naalakkersuisunut kattuffinnut timersornermullu peqatigiiffinnut taama ittunut naammassisaqarnissamik isumaqatigiissusiornissaat. Taamaattoq tamatumani Naalakkersuisut taama ittumik naammassisaqarnissamik isumaqatigiissusiornissaannut mattunneqanngillat, Naalakkersuisut kattuffiillu imaluunniit timersornermik peqatigiiffiit tamanna siunertanut naapertuuttutut isumaqarfigippassuk. Tapiissutinilli siunertalittut aqqissuunneqarsinnaapput tapiissutit ilaannik siunertanut aalajangersimasunut atugassiinikkut kiisalu atugassarititanik aalajangersaanikkut.

Imm. 3-mut

Aalajangersagaq imm. 1-imut tunngatillugu isigineqassaaq, tassani ersippoq Naalakkersuisut ukioq tamakkerlugu immikkut kattuffinnut timersortarfimmillu peqatigiiffinnut, Kalaallit Nunaanni Timersoqatigiit Kattuffianni ilaasortaangitsunut, tapiissuteqartartut. Tapiissutit piumasaqaateqarnissaat naatsorsuutigigaanni, piumasaqaatit imm. 1-imi ilaatinneqartunut pissusissamisoortutut attuumassuteqassapput.

Nr. 4-mut

Imm. 1-imut

Aalajangersakkami pineqarput pissassatinik atuinermut pitsaaliuinermut akiuiniarnermullu malittarisassanik malinninnissamik eqquutsitsinissamillu pisussaataitanerit.

Aalajangersakkami oqaaseqatigiit aappaanni erseqqissarneqarpoq, maleruagassanik sakkortuumik imaluunniit arlaleriarluni unioqquitsinerit tapiissutinik pissarsiniarneq pisinnaajunnaarsinneqassasoq aammalu siusinnerusukkut tunniunneqareersimasut utertinneqassallutik.

Imm. 2-mut

Aalajangersakkami pineqarput unammilluni timersornermi pissassatinik atuinermut pitsaaliuinermut akiuiniarnermullu malittarisassanik malinninnissamik eqquutsitsinissamillu pisussaatitaanerit. Aalajangersakkami oqaaseqatigiit aappaanni erseqqissarneqarpoq, maleruagassanik sakkortuumik imaluunniit arlaleriarluni unioqqutitsinerit tapiissutinik pissarsiniarneq pisinnaajunnaarsinneqassasoq aammalu siusinnerusukkut tunniunneqareersimasut utertinneqassallutik.

Nr. 5-imut

Imm. 1-imut

Aalajangersakkami taamaallaat allannguutaavoq "taamaattoq imm. 2 takuuk" ilanngunneqarmat takutinniarlugu pisut ilaanni Kalaallit Nunaanni Timersoqatigiit Kattuffiat Kalaallit Nunaanni aqqissuussamik timersornermut timigissarnermullu suliaqarnermut Kalaallit Nunaat sinnerlugu sinniisuusarsinnaanngimmat.

Imm. 2-mut

Timersuummi pineqartumi immikkut kattuffeqarpat Kalaallit Nunaannut immikkut kattuffik sinniisuusassaaq. Tamatumani takutinniarneqarpoq immikkut kattuffiit tassaatinneqarmata kattuffiit timersuummi pineqartumi timersornermik peqatigiiffiit soqutigisaannik isumaginnittut.

Nr. 6-imut

Imm. 1-imut

Aalajangersakkakut aalajangerneqarpoq pisuni timersuutini Elite Sport Greenland-ip, Kalaallit Nunaat pisortatigoortumik sinniisuuffigissagaa, tamatumani nunat tamalaat akornanni pisoqartillugu. Aalajangersakkami aalajangerneqarpoq timersuutini immikkut kattuffiit timersoqatigiiffiillu Kalaallit Nunaanni Timersoqatigiit Kattuffianut ilaasortaannigitsut eqqarsaatigalugit timersuummi pineqartumi kattuffiup pisortatigoortumik Kalaallit Nunaat, tassunga ilanngullugu nunat tamalaat sinniisuuffigissagai.

Imm. 2-mut

Aalajangersakkami Elite Sport Greenlandip suleqatigalugu siunertaminik qanoq tapersersuissanersoq aalajangersarneqarpoq. Immikkut kattuffiit Kalaallit Nunaanni Timersoqatigiit Kattuffiannut ilaasortaannigitsut ilanngunneqarput, aamma tassani erseqqissarneqarpoq, timersoqatigiiffiit taaneqartut tassaasut immikkut kattuffinni aqqissussamiinngitsuusut.

Aalajangersakkami aammattaaq maannakutut aalajangersarneqarpoq anguniagaq qanoq siuarsarneqassanersoq.

Nr. 7-imut

Aalajangersagaq naapertorlugu kattuffik Naalakkersuisut allattoqarfimmik ikiuuttassapput.

Allattoqarfimmik ikiuinermi ilaatinneqassapput kattuffiup sulinermini allattoqarfimmik ingerlatsinermi suliasat nalinginnaasut, soorlu ataatsimiinnissanut piareersaaneq, Nakorsaatit Pissassaatitut Atorneqarnerinut Kalaallit Nunaanni Akiuisunut ingerlatsineranut tunngatillugu apeqqutinik ingerlatsineq aammalu ataatsimiititaliap suliasami ingerlannissaanut ikiorserneqarnera.

Nr. 8-mut

Aalajangersagaq allanngortinneqarpoq nr. 2-mik ilanngussinikkut, tassa Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi peqatigiiffiit aamma timigissartarfiit avataanni timersornermi timigissarnermilu ingerlataqartut kattuffiit. Tamatuma kingunerissavaa Nakorsaatit Pissassaatitut Atorneqartarnerinut Kalaallit Nunaanni Akiuisut pissassaatinik atuinermik akiuinermut pitsaaliuinernullu immikkut kattuffinnut timersoqatigiinnullu peqatigiiffinnut suleqatigiinnissamik isumaqatigiissusiornissaat.

Nr. 9-mut

Aalajangersagaq allanngortinneqarpoq ilassuteqarnikkut immikkut kattuffiit timersornernullu peqatigiiffiit Kalaallit Nunaannit Timersornermut Kattuffimmut attuumassuteqanngitsut immikkut kattuffiit, timersornermut peqatigiiffiit kiisalu qasujaallisarfiit timigissartarfiillu atuisunut aamma ilisimatitsissuteqartussaataalernerinik Nakorsaatit Pissassaatitut Atorneqarnerinut Kalaallit Nunaanni Akiuisunik suleqatigiinnissamut isumaqatigiissuteqarsimanerlutik.

§ 2-mut

Aalajangersakkami siunnersuutip atuutilerfissaa allanneqarpoq.

Piffissaq atuutilerfik tapiissutit eqqarsaatigalugit kiisalu Nakorsaatit Pissassaatitut Atorneqartarnerinut Kalaallit Nunaanni Akiuisunik allanngortitsinikkut pitsanngorsaaniarneq aaqqissuussiniarnerlu allannguutai eqqarsaatigalugit pissasoq siunnersuutigineqarpoq.

Siunnersuut inatsimmut atuuttumut sanilliullugu	
Oqaasertaliunneqartut atuuttut	Inatsisissatut siunnersuut
§ 1. Inatsit timersornermut tunngasunut atorneqarpoq, ataasiakkaallu peqqissuunerat, atugarissaarnerat aamma timikkut, tarnikkut inuuniarnikkullu ineriartornerisa unammillersinnaanerisalu nukittorsarneqarnissaat siunertaralugit timersornermik siuarsaassaaq, tassunga ilanngullugu unammilluni timersornermik timigissarnermillu siuarsaassaaq.	1. § 1 imatut oqaasertalerneqassaaq: "§ 1. Inatsisartut inatsisaata timersorneq siuarsassavaa, tassunga unammilluni timersorneq timigissarnerlu ilaapput, tamatumuunakkut inuit ataasiakkaat peqqissusaat, atugarissaarnerat, aamma timikkut, tarnikkut, inooqatigiinnikkullu ineriartornerat kiisalu unammillersinnaassuseqarnerat nukittorsarniarneqarpoq. <i>Imm. 2.</i> Unammilluni timersorneq tassaavoq timersornermi unamminertalimmi, malittarisassat aalajangersimasut malillugit ingerlanneqartartoq. Unammilluni timersorneq timersornikkut, eqqarsartaatsikkut elektroniskimillu periarfissat atorlugit ingerlanneqarsinnaavoq."
§ 2. Inatsimmi matumani timersorneq tassaavoq timigissarniarluni aamma peqqissarniarluni timi atorlugu sammisaqarneq. <i>Imm. 2.</i> Inatsimmi matumani timigissarneq tassaavoq kalooriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnerit. <i>Imm. 3.</i> Inatsimmi matumani sunngiffimmi peqqissarneq tassaavoq tarnikkut, sianissutsikkut timikkullu sammisaqartarneq pilerseqqinniarlugu. <i>Imm. 4.</i> Inatsimmi matumani unammilluni timersorneq tassaavoq timersornerup ilaa, aalajangersimasunik maleruagassaqarluni ingerlanneqartartoq, taakkunanilu unammineq.	2. § 2 atorunnaarsinneqarpoq.
	3. § 11-p kingorna § 11 a-tut ilanngunneqassaaq: ” § 11 a. Immikkut kattuffinnut timersoqatigiiffinnullu Kalaallit Nunaanni Timersoqatigiit Kattuffiannut ilaasortaannigitsunut aningaasanut inatsimmi aningaasaliinertigut Naalakkersuisut ukiumoortumik tapiissuteqartarput.

	<i>Imm. 2. Tapiissutit ilai siunertanut aalajangersimasunut immikkut atugassanngortinneqarsinnaapput.</i> <i>Imm. 3. Tapiissutit atugassarititanik aalajangersimasunik piumasaqaatitaqarsinnaapput.”</i>
§ 13. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqartoq taakku nakorsaait pissassaaitut atorneqartartut pitsaaliornissaat akiuinerlu pillugu Nakorsaait Pissassaaitut Atorneqarnerinut Kalaallit Nunaanni Akiuisut maleruagassanik aalajangersagaanik malitsissasut eqqortitsissasullu pillugu maleruagassanik aalajangersaaneq, § 21, imm. 2, nr. 5 takuuk. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq. <i>Imm. 2.</i> Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut atortissasullu pillugu maleruagassanik aalajangersaaneq, § 5, imm. 2 takuuk. Malittarisassanik taakkuninnga peqqarniitsumik, arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissaannik piumasaqaateqarnermik kinguneqassaaq.	4. § 13 imatut oqaasertalerneqassaaq: ” § 13. §§ 11, 11 a aamma 12 naapertorlugu tapiissuteqarnissamut piumasaqaataavoq tapiissuteqarfigineqartussanit Nakorsaait Pissassaaitut Atorneqartarnerinut Kalaallit Nunaanni Akiuisunit nakorsaait pissassaaitut atorneqarnerinik pitsaaliornissaq akiuinissarlu pillugit aalajangerneqarsimasut malinneqarlutillu eqquutsinneqassasut, tak. § 21, imm. 2, nr. 5. Malittarisassanik taakkuninnga peqqarniitsumik arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqareersut utertillugit akiliisoqarnissamik piumasaqaateqarnermik kinguneqassaaq. <i>Imm. 2.</i> §§ 11, 11 a aamma 12 naapertorlugu tapiissuteqarnissamut piumasaqaataasinnaavoq tapiissuteqarfigineqartussanit Naalakkersuisunit timersorluni unamminernik allanngortiteriniarnermik pitsaaliornissaq akiuinissarlu pillugit aalajangerneqarsimasut malinneqarlutillu eqquutsinneqassasut, tak. § 5, imm. 2. Malittarisassanik taakkuninnga peqqarniitsumik arlaleriarluniluunniit unioqqutitsinerit tapiiffigitinnissamut pisinnaatitaajunnaarnermik kiisalu tapiissutit tunniunneqarsimasut utertillugit akiliisoqarnissamik piumasaqaateqarnermik kinguneqassaaq.”
§ 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuvoq.	5. § 19 ima oqaasertalerneqassaaq: ”§ 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut

	tamalaanut atatillugu sinniisuuvoq, taamaattorli imm. 2. takuuk. <i>Imm. 2.</i> Timersuutit immikkut kattuffinnut timersoqatigiiffinnullu Kalaallit Nunaanni Timersoqatigiit Kattuffiannut ilaasortaannngitsunut tunngatillugu, timersuummi pineqartumi kattuffiup pisortatigoortumik, tassunga ilanngullugu nunat tamalaat akornganni Kalaallit Nunaat sinniisuufiggissavaa.”
§ 20. Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq. <i>Imm. 2.</i> Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, timersoqatigiiffiit aamma timigissartarfiit suleqatigalugit siunertaminik tapersersuissaaq, ilaatigut ukununnga tapersersuermigut: 1) timersornermi piginnaaneqarlutut nunarpullu sinnerlugu unammisartut sungiusarnerat unammiaaarnermilu peqataanerat, nunat tamalaat akornanni pikkorinnerit peqataanissaannut periarfissanik siursaasut, 2) piginnaasaqarlutut inerisaaneq, tassani siunertarineqarluni kingusinnerusukkut nunat tamalaat akornanni pikkorinnerit unammiaaarnernut peqataanissaat, 3) pikkorinnernut sungiusaasut ilinniartinnerilu, 4) Kalaallit Nunaanni timersornermi nakorsaasersuermik ilisimasanik inerisaaneq, aamma 5) kalaallit immikkut kattuffiit aqqissuusaanikkut inerisaaneq nunanut allanut unammisartut soqutigisaannik nunallu akornanni peqataanermut isumaginninneq.	6. § 20, imm. 1 aamma 2, imatut oqaasertalerneqassapput: ” Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Pisortatigoortuni, soorlu nunat assigiinngitsut akornganni, kattuffik Kalaallit Nunaannut sinniisuuvoq. Timersornermi timigissarnikkullu aqqissugaasumik ingerlataqarneq pillugu Kalaallit Nunaanni Timersoqatigiit Kattuffiat peqatigalugu sinniisuuneq pisarpoq. Immikkut kattuffik aamma timersortartut peqatigiiffiat Kalaallit Nunaanni Timersoqatigiit Kattuffiannut ilaasortaannngikkaangat timersuummi pineqartumut immikkut kattuffik peqatigalugu sinniisuuneq pisarpoq. <i>Imm. 2.</i> Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, matumani Kalaallit Nunaanni Timersoqatigiit Kattuffiannut ilaasortaannngitsut, timersoqatigiiffiit immikkut kattuffeqanngitsut aamma timigissartarfiit suleqatigalugit siunertaminik tapersersuissaaq ilaatigut ukununnga tapersersuermigut: 1) timersornermik piginnaasallit timersortartullu pikkorivissut sungiusarnerinut aamma unamminneri peqataanerit, nunani tamalaani pikkorivissut timersornerini peqataanissamut periarfissamik siursaasooq, 2) nunat assigiinngitsut akornganni timersornermi kingusinnerusukkut peqataanissaq siunertarlugu piginnaasalinnik inerisaaneq,

	3) pikkorivissut pillugit sungiusaasut ilinniartitsinerillu, 4) Kalaallit Nunaanni timersornermi nakorsaanikkut immikkut ilisimasalinnik ineriartortitsineq, aamma 5) pikkorivissut soqutigisaannik isumaginninneq nunallu assigiinngitsut akornganni peqataanissaq siunertarlugu kalaallit nunaanni immikkut kattuffinnik aaqqissugaasumik ineriartortitsineq.”
<i>Imm.</i> Kalaallit Nunaanni Timersoqatigiit Kattuffiat ataatsimiititaliamit atorneqarsinnaasumik allattoqarnikkut ikiuissaaq.	7. § 22, imm. 5, imatut oqaasertalerneqassaaq: " <i>Imm.</i> 5. Naalakkersuisut ataatsimiititaliamit atorneqarsinnaasumik allattoqarnikkut ikiuissaaq”
§ 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatinik pissassaaticut atuinerup pinngitsoortinnissaanik siunertarluni Nakorsaatit Pissassaaticut Atorneqartarnerinut Kalaallit Nunaanni Akiuisut nakorsaatit pissassaaticut atorneqarnerinik pitsaaliornissaq akiuinissarluni pillugit ukuninnga suleqateqarnissamik isumaqatigiissuteqassaaq: 1) Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma 2) Kalaallit Nunaanni Timersoqatigiit Kattuffianut ilaanngitsut Nakorsaatit Pissassaaticut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiissutigissavaat.	8. § 23, imm. 1, imatut oqaasertalerneqassaaq: " Kalaallit Nunaanni Timersoqatigiit Kattuffiannut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatinik pissassaaticut atuinerup pinngitsoortinnissaanik siunertarluni Nakorsaatit Pissassaaticut Atorneqartarnerinut Kalaallit Nunaanni Akiuisut nakorsaatit pissassaaticut atorneqarnerinik pitsaaliornissaq akiuinissarluni pillugit ukuninnga suleqateqarnissamik isumaqatigiissuteqassapput: 1) Timigissartarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkunungalu eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut ilaanngitsut. 2) Kalaallit Nunaanni Timersoqatigiit Kattuffiannut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu ingerlataqartut immikkut kattuffii.”
§ 24. Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffianut	9. § 24, imm. 1, imatut oqaasertalerneqassaaq: “ Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkunungaluunniit eqqaanartunik

ilaanngitsut, Nakorsaatit Pissassaatitut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiissutigissavaat, tak. § 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit aamma timigissartarfiit avataanni timersornermi timigissarnermilu ingerlataqartut kattuffii.	sammisaqartitsisut aamma Kalaallit Nunaanni Timersoqatigiit Kattuffiannut ilaanngitsut, Nakorsaatit Pissassaatitut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiisassapput, tak. § 23. Taamatuttaarlu immikkut kattuffinnut timersoqatigiiffinnullu aamma timersoqatigiiffiit timigissartartullu kattuffiinnut Kalaallit Nunaanni Timersoqatigiit Kattuffiannut ilaasortaannngitsunut imaluunniit Kalaallit Nunaanni Timersoqatigiit Kattuffianniittunut immikkut kattuffinnut, timersoqatigiiffinnut kiisalu timigissartarfinnut attuumassuteqanngitsunut aamma atuuppoq.”
	§ 2 Inatsisartut inatsisaat ulloq 1. januar 2027 atuutilissaaq.

Tusarniaanermut allakkiaq

Siunnersuut tusarniaavigisartakkanut ukununga ulluni 23. December 2025-miit 23. Januar 2026-mut tusarniutigineqarpoq:

Avannaata Kommunia
Kommune Qeqertalik
Qeqqata Kommunia
Kommuneqarfik Sermersooq
Kommune Kujalleq
Inuit Pisinnaatitaaffii pillugit Siunnersuisoqatigiit
SIK
IMAK
Timersoqatigiit Kattuffiat
Elite Sport Greenland
Tilioq
Inuit Esport

Taassuma saniatigut siunnersuut Naalakkersuisut tusarniaanerminni nittartagaat aqqutigalugu piffissami tassani takuneqarsinnaavoq.

Piffissap tusarniaaffiusup naanerani tusarniaanermut akissutit 3-t tiguneqarput. Tusarniaanermi akissutit ataani allaaserineqarput, tamatumalu kingorna naalakkersuisoqarfiup tusarniaanermi akissuteqaatit pillugit oqaaseqaatai ilanngunneqarlutik. Tusarniaanermi akissutit § 20, imm. 2-mi erseqqissaanermik pilersitsisimapput aammalu nassuiaatinut erseqqissaanermik pilersitsisimallutik.

SIK allappoq:

SIK-p ilisimalluarpaa Namminersorlutik Oqartussat kissaatigigaat E-sport timersornertut akuerineqassasoq, timersuutit allat akuerisaasut assigalugit, pingaartumik inuusuttut inissaqartinniarlugit. Kisianni SIK-p erseqqissarpaa tamanna Kalaallit Nunaanni Timersoqatigiit Kattuffiata nunarsuarmi timimik aalatitsinerpaanngornissamik anguniagaanut akerliusoq. SIK-p eqqumaffigivaa E-sport timersorneq issiaffiusoq, aammalu E-sport timersornertut akuerineqarpat timikkut aalatitsinermut naapertuutinngitsoq.

Oqaatigineqartariaqarpoq E-sport timersornertut akuerineqarnera timikkut aalatitsineq akigineqartariaqanngitsoq. E-sport-ertartut akunnerpassuarnik issiasartuupput, kisianni aamma akissarsiutigalugu E-sport-ertartut pitsaannerusumik sungiusarsinnaajumallutik timikkut sungiusartarput. E-sport-imik timersortartut eqqarsartaatsimikkut inuttullu peqqissusaannut annertuumik sunniuteqarsinnaavoq, tassani minnerunngitsumik inuusuttut inuttut inooqataanikkullu ajornartorsiuteqartut inuiaqatigiinnut ilaalersinnaapput. Tamanna inuit amerlanerusut inuiaqatigiinnut allatut ilaasinnaanngitsunut ilaalernissaannut pissutaasinnaavoq.

Tamatuma saniatigut SIK allappoq, suliffissuaqarneq IT nòrd-inik pisariaqartitsisoq, tamannalu suliffeqarfippassuit piumasaraat. SIK-p ernummatigaa sulisut ilaasa E-sport-imik timersorneq IT-mi sulinerminniit pingaarnersiornissaannut kajumissuseqarsinnaanerat, E-sport-imik timersorneq timersornertut akuerineqassappat.

Eqqaamasariaqarpoq, E-sport-imik timersortartut tamarmik IT-mik suliffeqarfinni sulinissamik soqutiginninnaviannngimmata, taamaattumillu ataatsimut isigalugu oqaatigineqarsinnaanngilaq. Suliffeqarfiit IT-mik piginnaasalinnik sulisussanik pisariaqartitsippata tamanna allaanerusumik aaqqinneqartariaqarpoq, taamaalilluni siunissami sulisussat suliffimmi pisariaqartitanut naleqquttumik ilinniagaqarnissaminnut isumassarsiortinneqassammata.

E-sport sulisut attaveqaatinut it-imut tunngatillugu piginnaasanik tapersersuisinnaavoq, soorlu suleqatigiinneq, pilersaarusionsioriaaseq eqqarsaqqissaartarnermi piginnaasaq, attaveqaqatigiinneq aammalu it-imut tunngatillugu ilinniakkat. E-sport aamma allanut it-imut tunngatillugu ilinniagaqarnissamut kajumissuseqalersitsisinnaavoq.

Kalaallit Nunaanni Timersoqatigiit Kattuffiat allappoq:

Kalaallit Nunaanni Timersoqatigiit Kattuffiat (GIF) siunnersuut tamaat ataatsimut isigalugu tapersersorpaat.

GIF-ip paasisimavaa timersorneq pillugu inatsisip nutarterneqarnissaa pisariaqarlunnartoq, nutarterinerup E-sporti aammalu qarasarsorluni unammiaaernerup ineriartornerat ersarinnerunissaa siunertaalluni. GIF-ip nutarterinissamut timersorluni peqatigiinnerit amerlanerit pisinnaalernissaat kiisalu tapersiisinnalernissaat, aammalu timikkut eqqarsartarnermillu peqqissuunissamut pitsaanagerusumik periarfissaqalernissaat pitsaasutut isigaa.

Tusaatissatut tiguneqarpoq.

GIF-ip taperserpaa E-sporti aammalu qarasarsorluni unammineq timersuutitut akuerineqarnissaat, kisianni siunnersuivoq erseqqarissunik malittarisassaliortoqassasoq, soorlu peqatigiiffiit imaluunniit kattuffiit qanoq GIF-imut ilanngunneqarsinnaanerannut, taamaalilluni malittarisassaliortoqassappat timersornermi ineriartortitsineq pitsaanagerusumik ataqatigiiffiusinnaavoq. GIF-ip aamma siunnersuutigaa erseqqarissumik nassuiarneqassasoq suna E-sportimi imaluunniit qarasarsorluni unammiaaernermi ilanngunneqassasoq — soorlu suut sammisassatut isigineqarsinnaanersut, imaluunniit suut kattuffittut inatsisip iluaniittariaqartutut ilanngunneqassanersut.

Suna timersornermi peqatigiiffittut imaluunniit suna kattuffittut GIF-imut ilanngunneqarsinnaanersoq, taanna aalajangersarneqartarpoq GIF-ip nammineq malittarisassiai naapertorlugit. Naalakkersuisut nassuiaatit ima paasivaat, GIF nammineerluni malittarisassanik erseqqarissakkanik suliaqarnissamut pisariaqartoqassappat aallartitsissasoq GIF-imut ilaasortanngorsinnaaneq pillugu.

E-sporti qarasarsorlunilu unammiaarneq qanoq paasineqassanersut pillugu kissaat oqaatigineqartoq, siunnersuutip nassuiaataani ilanngunneqareerpoq immikkoortumi 2.2-mi, tassani allaqqasoq suut E-sportimi imaluunniit qarasarsorluni unammiaaarnertut ittut paasineqarsinnaanersut pillugu nassuiaateqarfigineqarlutik.

“E-sporti, elektronisk sportimik aamma taaguuteqartoq, nalinginnaasumik atorineqartarpoq unamminermi ingerlatsinermi qarasaasiatigut ingerlanneqartuni. Taamatut pinnguaatit ingerlatsiffigineqartarput qarasaasiatigut, konsolini tassa spillerutit assigiinngitsuni imaluunniit mobiltelefoni atorlugit. Timersorneq IT atorlugu ikiorserneqartoq nalinginnaasumik ilanngunneqartarpoq E-sportimut nassuiaanermut. Assersuutigalugu E-cykling aamma E-roning ilanngunneqarsinnaanngillat. Siunnersuutip iluani atorineqartoq tassaavoq E-sporti.

Qarasarsorluni unammiaarneq imaappoq, unamminerup inernera timip piginnaaneqarneranit aalajangiunneqarneq ajorluni, kisianni isumap eqqarsartaatsillu aalassarinneranit aalajangersarneqartarluni. Pinnguaatit qarasarsorluni unammiaarnerit taaguuteqaannarsinnaappat, angusarineqartut inernerat peqataasut piginnaaneqarneranit aalajangerniarneqartaraluartoq. Qarasarsorluni unammiaarnerit soorlu pinnguaatit (skak), backgammon, bridge kiisalu nallukattat aningaasarsiutigalugu unammiaaarnertut ingerlanneqartartut. Taamatut eqqaaneqarsinnaavoq nunarsuaq tamakkerlugu aqqissuisut soorlu International Mind Sports Association (IMSA) soorlu skak, bridge, go, mahjong aamma poker il.il. sinnerlugit sinniisuusut.”

GIF isumaqarpoq, E-sporti aamma qarasarsorluni unammiaarneq unamminermi timersuutitut ilanngunneqartalissappata periarfissiissasoq innuttaasut nutaanik peqataalernerannut, inuusuttunut, innarluutillit kiisalu innuttaasut timertik atorlugu timersorsinnaanngitsut ilanngullugit periarfissinneqassasut. Tamanna peqatigalugu annertusaassaaq peqataasut akornanni ataatsimoorfiusut aammalu peqataaneq ukioqatigiiaannut, suaassutsinut aammalu innuttaqarfinni tamalaani. Akerlianik aamma immikkut isumannaallisaanikkut aarlerinartoqarpoq, soorlu timimik aalatitsinnginnerulerneq annertusineqassaaq, kisimiinnerulertarneq imaluunniit peqqinnissakkut ulorianartunik kinguneqartitsisinnaaneq, pingaartumik inuusuttuni, paasissutissiinikkut siuarsaanikkullu malitseqartinnagu.

Tusaatissatut tiguneqarpoq. Naalakkersuisut timersorneq pillugu peqatigiiffiit aammalu soqutigisaqatigiit allanut suleqatigineratigut oqaloqatigiissutigissavaat qanoq pitsaasumik paasissutissiineq ingerlanneqarsinnaanersoq eqqaaneqartunit sunniutaasinnaasut annikillisaaniarluni.

GIF isumaqarpoq, peqatigiiffiit amerlasuut immikkut soqutigisallit kattuffiillu immikkut ittut aningaasaliissutinik tapersersorneqarnissaminnut periarfissaqarsinnaalissasut timersornermut aqqissuussamut peqataajumallutik, taamaalillutillu timersornermi annertusaanissamut, nutaaliornissamut ineriartortitsinissamullu periarfissiissallutik.

Tusaatissatut tiguneqarpoq.

GIF-ip pitsaasutut isigaa, kattuffiit GIF-imut attuumassuteqanngitsut Kalaallit Nunaat sinnerlugu nunani tamalaani peqataasinnaalernissaat periarfissinneqassammat, taamaattumillu Kalaallit Nunaata peqataaneranut saqqummiunneqarneranullu nukittunerulersitsisinnaalluni nunarsuarmi unamminerni.

Tusaatissatut tiguneqarpoq.

GIF-ittaaq pitsaasutut isigaa, Nakorsaaitit Pissassaaitut Atorneqartarnerinut Kalaallit Nunaanni Akiuisunut allattoqarfimmi aqutsisut nammineq ingerlatsisussaq pilersinneqassappat, tassuunatigut arlaannaannulluunniit attuumassuteqannginneq aammalu pitsaassuseq annertusarnissaanut periarfissiisoqarluni nakorsaatinut pissassaaitut atorneqartartut akiorniarneqarnerata iluani.

Tusaatissatut tiguneqarpoq.

GIF-ip ernummatigaa, kattuffiit amerlanerusut aammalu soqutigisallit peqatigiiffiit amerlanerusut periarfissaqalissappata peqataajumallutik sullissinermut aqqqissuussanut tunngatillugu aningaasatigut tapersorsorneqarnissamut, taamaalillunilu aningaasatigut tunngavissat pillugit unamillernertut annertusisinnaallutik.

Nalinginnaasumik nassuiaatini 3. Pisortanut aningaasaqarnikkut allaffissornikkullu sunniutissat oqaatigineqartutut, tapersersuinerit immikkut ittut immikkoortunut peqatigiiffinnut E-sporti aamma qarasarsorluni unammiaarnerq eqqarsaatigalugit aningaasanut inatsimmi aalajangersarneqartarput. Taamaattumik immikkut aningaasaliissuteqartarnerq ingerlanneqassaaq GIF-imut ilaasortaannngitsunut peqatigiiffinnut.

GIF-ip aamma ernummatigaa, GIF-ip inissisimanera timersornermut sinniisuusarnermi annertuumik sunniuteqartuusoq pakatsisinneqarsinnaasoq peqatigiiffiit amerlanerusut nunarsuaq tamakkerlugu attaveqaatinut toqqaannartumik peqataasinnaalerpata, taamaalilluni ataatsimoornerup ataatsimoortumik oqariartuuteqarnerq isumannaatsuunnginnerulersinnaalluni.

GIF tassaavoq Kalaallit Nunaata nunatsinni aammalu nunat tamalaani timersornermut aqqqissuussanut sinniisuuffia pisortatut pingaaruteqartoq, tak. siunnersuutip § 19, imm. 1. Timersorneq eqqarsaatigalugu immikkoortut aalajangersimasut akornanni peqatigiiffiit imaluunniit immikkut soqutigisallit GIF-imut ilaasortaannngitsut pineqarput, taava taakku nammineq Kalaallit Nunaat sinnerlugu nunani tamalaani sinniisuussapput tak. § 19, imm. 2. Taanna pissuteqarpoq immikkut aqqqissugaanikkut pissutsit immikkut ittut atorlugit. Taamaattumik nalorninaanngilaq Kalaallit Nunaanni Timersoqatigiiffiit Kattuffiat pingaarnertut suli sinniisuussammat.

Tapiissutinik aqqqissuussamut tunngatillugu GIF isumaqarpoq tapiissutinik agguaassisarneq pitsaassutsit, ileqqorissaarneq, pissassaait atonerannut akiuiniarneq akuunersulersitsinerlu qitiutillugit suliarineqartariaqartoq, taamaalilluni timersornermi inuunerup tunngavigisaa pioreersoq sanngiinnerulersinnagu. Tamanna pissutigalugu GIF-ip kalaallit timersornerannut

pingaarnertut sinniisuunini attatiinnarusuppaa, aamma nunat tamalaat akornanni. GIF-ip siunnersuutigaa GIF-ip aamma timersornermik kattuffiit nutaat aamma/imaluunniit immikkut ittumik kattuffiit akornanni akuerisaanermut aamma suleqatigiinnermut aalajangersimasumik periaatsinik pilersitsisoqassasoq, taamaalilluni timersorneq tamakkerlugu timersornermik ineriartortitsinermi ataqatigiinneq pitsaassuserlu qulakkeerneqassasoq.

Inatsimmi atuuttumi immikkoortuni §§ 3-6-imi ersepoq timersornermik peqatigiiffiit, timersornermik kattuffiit aamma timersornermik klubbit kiisalu timigissartarfiit aamma suliffeqarfiit allat timersornermik imaluunniit timersornermik neqerooruteqartut timersornermik timersornermillu isumannaatsumik, toqqisimanartumik aammalu minguitsumik qulakkeerisariaqarmata. Siunnersuummi 13-imi aalajangersarneqartutut, tapiissutinik agguuassisarneq piumasaqaateqalereerpoq tapiissutinik pissarsisussat pissassaait atornerannut pinaveersaartitsineq akiorniarnerrallu pillugit maleruagassanik Nakorsaait Pissassaaitut Atorneqartarnerinut Kalaallit Nunaanni Akiuisuniit aalajangersakkanik malinninnissaannik atuutsitsinissaannillu. Maleruagassat taakku atuutissapput apeqqutaatinagu timersorneq ataaseq allaluunniit pineqarpat, tak. siunnersuummi §§ 23 aamma 24. Nassuiaammi matumani pineqartut allat assingusunik oqaaseqaateqarnernut atatillugu qulaani oqaaseqarfigineqareerput.

GIF-ip Nakorsaait Pissassaaitut Atorneqartarnerinut Kalaallit Nunaanni Akiuisunut namminersortumik allattoqarfeqalernissaanik kissaateqarneq tapersersorpaa, kisianni tamanna pillugu oqaloqatigiittoqarnissaa kissaatigaa aammalu ilisimasat misilittakkallu annaanginnissaat anguniarlugu allanngueqataasinnaanissani neqeroorutigaa. *Tusaatissatut tiguneqarpoq.*

GIF-ip innersuussutigaa E-sport-imik timersornerup aamma eqqarsartaatsikkut timersornerup akuerineqarnera paasissutissiinermik pinaveersaartitsinermillu malitseqartinneqartariaqartoq, eqqissisimasumik peqataatitsinermik siuarsaanermik aammalu annertuumik spillertarnerup kingunerisaanik ajortunik pinaveersaartitsisunik, assersuutigalugu atuarfinnik peqatigiiffinnillu suleqateqarnikkut. Tamatuma saniatigut GIF-ip erseqqissarpaa, timikkut aalatitsineq killeqartoq, E-sport-imik timersorneq finmotorik-kimik aammalu pinertussuseqarnissamik pisariaqartitsisoq.

Tusaatissatut tiguneqarpoq. Ajortumik kinguneqarsinnaasut pillugit paasissutissiinermut pinaveersaartitsinermullu tunngatillugu suliassat nalinginnaasut pillugit oqaaseqaatinut atatillugu qulaani oqaaseqaatit tunngavigineqarput.

Elite Sport Kalaallit Nunaat allappoq:

Elite Sport Greenlandip siunnersuut tamanut taperserpaa, aammalu E-sport-imik timersornerup aamma eqqarsartaatsikkut timersornerup unammillersinnaasutut akuerineqarnissaat pitsaasumik isigalugu, tamannalu klubbimi inuunermik nukittorsaasinnaavoq aammalu piginnaasanik ineriartortitsinermut periarfissanik nutaanik pilersitsisinnaalluni.

Tusaatissatut tiguneqarpoq.

Elite Sport Greenlandip aamma taperserpaa Nakorsaaitit Pissassaaitut Atorneqartarnerinut Kalaallit Nunaanni Akiuisunut allattoqarfimmi ikiorsiissutit Kalaallit Nunaanni Timersoqatigiit Kattuffianniit Naalakkersuisunut nuunneqarnissaat, tamannalu nakorsaatinut atuinermik akiuiniarnermi sulinerup nammineersinnaassusia uppernassusiallu nukittorsarniarpai.

Tusaatissatut tiguneqarpoq.

Elite Sport Greenlandip taperserpaa nassuiaatip annertusarneqarnissaa timikkut, eqqarsartaatsikkut aamma elektronisk-iusumik timersorneq ilanngunneqarnissaa. Tamatuma saniatigut Elite Sport Greenlandip Kalaallit Nunaanni Timersoqatigiit Kattuffiata avataaniittunut peqatigiiffinnut tapiissuteqarnissamik siunnersuutit taperserpai, innersuussutigaluguli pisortat aningaasaataannik akisussaassuseqartumik atuinissaq qulakkeerniarlugu aaqqissuussaannikkut piginnaanngorsaanermut ersarissuunermullu piimasaqaatit atuutilersinneqassasut.

Pisortat aningaasaataasa tamarmik akisussaassuseqartumik atorneqarnissaat piimasaqaataareerpoq. Peqatigiiffiit aaqqissuussaasut, ilaatigut timersornermut kattuffiit, akisussaassuseqartumik aqutsisoqarluni aaqqissuunneqartassapput, tamannalu naliginnaasumik isumaqarpoq siulersuisut. Siulersuisut peqatigiiffiup aningaasaqarneranut akisussaasuupput, taamaattumillu tapiissutit atugassarititaasut naapertorlugit atorneqarnissaa qulakkeertariaqarpaat.

Siunnersuummi § 20, imm. 2-mut tunngatillugu Elite Sport Greenland allannguutissatut siunnersuuteqarpoq (ersarissakkamik nalunaarsorneqarsimasoq), tassani Elite Sport Greenlandip § 20-mi imm. 2-mut imatut oqaasertalersuinissaq siunnersuutigaa:

"Imm. 2. Elite Sport Greenlandip Kalaallit Nunaanni Timersoqatigiit Kattuffiat taassumalu immikkoortortaqarfii, immikkoortortaqarfiit Kalaallit Nunaanni Timersoqatigiit Kattuffiannut ilaasortaannngitsut, kiisalu timersoqatigiit immikkut **kattuffeqanngitsut** suleqatigalugit siunertani siuarsarniarpai, ilaatigut aqqutigalugit:

- 1) **Timersortartut pikkorivissut tapersersorneqarnissaat, nunat tamalaat akornanni qaffasissumik ineriartornissaannut siuarsaanissaq siunertaralugu,**
- 2) **Neriunaatilinnik ineriartortitsineq qulakkeerlugu, neriunaatillit siunissami unammillersinnaassusiisa nunat tamalaat akornanni qaffasissumik qaffassarneqarnissaa siunertaralugu,**
- 3) **Pikkorivissunut timersortartunut naleqqussagaasumik sungiusaasunik ineriartortitsineq neqeroorutigissavat,**
- 4) Kalaallit Nunaanni **ilisimasanik katersuivimmik** ineriartortitsineq, aamma
- 5) Pikkorivissut aamma nunat tamalaat akornanni **unamminerni** soqutigisaat illersorniarlugit aaqqissuussaannermik ineriartortitsinermut **avitseqatigiinnermik aamma siunnersuinnermik neqerooruteqarneq.**"

Elite Sport Greenlandip timersortartunut pikkorivissunut tapersersuinerup siunertarineqarnissaanik siunnersuuteqarnerata tunuliaqutaa tassaavoq, tapersersuineq

piffissami sivisuumi timersortartut nunat tamalaat akornanni qaffasinnerpaamut ineriartortinneqarnissaannut siunertarineqarsinnaammat aammalu suliaassanut aalajangersimasunut imaluunniit nunat tamalaat unammiaarnerini maannakkut peqataasarnernut kisimik ataqatigiissinnagu.

Elite Sport Greenlandip uppersarsarusuppaa aqqissuussaq aningaasatigut tapersersuisutut kisimi inissisimassanngitsoq, kisianni aamma siunissami unammillersinnaanermik qulakkeerisuulluni, tamannalu takutitsivoq suliniut piujuartumik sunniuteqassasoq.

Elite Sport Greenland naapertorlugu sungiusaasunik ineriartortitsineq timersornermut pikkorivissunut naleqqussarneqartariaqarpoq.

Elite Sport Greenlandip Kalaallit Nunaanni ilisimasani katersuivimmik ineriartortitsisoqarnissaa kissaatigaa, timersornermut nakorsaatinik ilisimasaqarneq kisiat pinnagu.

Elite Sport Greenlandip § 20-p, imm. 2-p allannguutissatut siunnersuutaanut tunngatillugu siunnersuut ilaatigut akuerineqarpoq, tassani "immikkut kattuffeqanngitsut" ilanngunneqarnera maanna erseqqissaatitut allanneqarsimammat. Allannguutissatut siunnersuummut tunngatillugu § 20, imm. 2, nr. 1-5, tamanna tusaatissatut tiguneqarpoq. Allannguutissatut siunnersuummi siunnersuutigineqartut pineqanngimmata, tamatumalu peqatigisaanik allannguutit pingaarutillit kingunerisassai naammattumik erseqqissarneqarsimanngitsut, Naalakkersuisut pissusissamisoortutut isigaat timersoqatigiiffinnut tamakku immikkut oqaloqatigiissutigissallugit.

Elite Sport Greenlandip § 20, imm. 3 allannguutissatut siunnersuutigaa, Elite Sport Greenlandip neriunaatilinnut timersortartunullu ilinniartitaanermut atatillugu atuuffia erseqqissarniarlugu. Siunnersuut ima allassimasoqarpoq:

"Elite Sport Greenland Naalakkersuisut suleqatigalugit timersornikkut piginnaasallit timersortartullu pikkorivissut **siuarsagassaraat** timersornikkut inuuniuteqarnerup saniatigut **timersortartunut pikkorivissunut naleqqussakkamik** ilinniarnissamik periarfissaqartillugit."

Aalajangersakkami pilersinneqareersimavoq, timersortartut pikkorivissut timersornerminnik ingerlatsinerminni tapersorneqartariaqarmata, taamaalilluni timersortartut pikkorivissut timersornermik inuunerminut atatillugu ilinniagaqarnissaminnut periarfissaqartinneqarlutik. Tamatuma saniatigut aalajangersakkap allanngortinneqarsinnaanera pisariaqarpoq timersornikkut kattuffiit ilinniarfeqarfiillu qanimut oqaloqatigineqarnissaat, tamanna Naalakkersuisut suliniuteqarfigissavaat.

Naggasiullugu Elite Sport Greenland allappoq, § 22-mi, imm. 5-imi, Nakorsaatinik Pissasaatinik Atorneqartarnerinut Kalaallit Nunaanni Akiuisunut allattoqarfimmut tunngatillugu nammineersinnaanermik qulakkeerinittumi, allannguut tapersersorlugu. Tusaatissatut tiguneqarpoq.